

皇宋通鑑長編紀事本末

四庫未收書提要

擘經室外集卷一

皇宋通鑑長編紀事本末一百五十卷提要

宋楊仲良撰。索李燾取北宋九朝事實，仿司馬光長編之體，編年述事，為續資治通鑑長編成書一百五十卷。卷帙最為繁重，仲良乃別為分門編類，以成此書。每類之中，仍以編年紀事。太祖七卷，太宗七卷，真宗十四卷，仁宗二十四卷，英宗四卷，神宗三十四卷，哲宗二十六卷，徽宗二十八卷，欽宗六卷，共一百五十卷。各有事目，目中復有子目。汴京百七十年，禮樂兵刑之沿革，制度政令之舉廢，粲然具備，可以案目尋求。李燾而後，陳均之前，煩簡得中，洵可並傳。而今所傳長編足本，徽欽兩朝皆已闕失，藉此得以攷見崖略，尤可貴也。仲良之名，不見於書中，卷端有寶祐

丁巳廬陵歐陽守道序亦不言著書人姓名而陳均九朝
編年引用書目中有之云長編紀事本末楊公仲良故知
此事出仲良手然其書不見於宋史藝文志而趙希弁陳
振孫馬端臨諸家亦皆不著錄近代藏書家惟季振宜徐
乾學兩家有之徐目云闕一百十四卷至一百十九卷今
此舊鈔本亦闕此六卷又闕六七兩卷而五八兩卷亦非
完表較乾學藏本蓋又多闕佚矣據守道序此書寶祐元
年刻於廬陵邵齋貢士徐璉重為校刻則寶佑五年也

皇宋紀事本末寶祐元年直徽猷閣謝侯守廬陵始以家藏本刻於郡齋侯既去予於郡學見之借授貢士徐君琥傳錄徐以郡本不可復得有意轉刻於家或謂卷帙繁多宜作節本予亟止之曰史未易節也前代史尚難之況國朝節史近於筆削儻不知史法而容易措手則去留失宜首尾不備使讀者憮然此與漏段闕字何異史館遴選尚不敢苟而私家新學見史輒節非予所敢知也徐君幸從予言而止刊既就以示予覆讀則頗疑其間多所舛訛蓋前此郡齋所刻往往未及點對而侯已去殊為可惜近有大字蜀本者予復借與數友參校乃知郡本固自多悞蜀本誤亦不免再質之於續通鑑長編尋其本文初意而後

敢以爲安所校正不啻千數百字然亦惟有誤則據本正
之儻無可據雖一字不敢輒增損也工告畢爲諧其所自
五年歲在丁巳十月望廬陵歐陽守道謹書

皇宋年號

太祖皇帝 建隆元年正月受禪

建隆三 乾德五 開寶九

太宗皇帝 開寶九年十月即位

太平興國八 雍熙四 端拱二

淳化五 至道三

真宗皇帝 至道三年三月即位

咸平六 景德四 大中祥符九

天禧五 乾興一

仁宗皇帝 乾興元年正月即位

天聖九 明道二 景祐四

寶元二

康定二

慶曆八

皇祐五

至和二

嘉祐八

英宗皇帝 嘉祐八年三月即位

治平四

神宗皇帝 治平四年正月即位

熙寧十

元豐八

哲宗皇帝 元豐八年三月即位

元祐八

紹聖四

元符三

徽宗皇帝 元符三年正月即位

建宗靖國一

崇寧五

大觀四

政和七

重和二

宣和七

欽宗皇帝 宣和七年十二月即位

靖康二

高宗皇帝 靖康二年五月即位

建炎四

紹興三十二

孝宗皇帝 紹興三十二年五月即位

隆興二

乾德九

淳熙十六

光宗皇帝 淳熙十六年二月即位

紹熙五

寧宗皇帝 紹熙五年七月即位

慶元六

嘉泰四

開禧三

嘉定十七

今上皇帝嘉定十七年九月即位

寶慶三

紹定六

端平三

嘉熙四

淳祐十二

寶祐六

開慶元年

景定萬萬年

皇宋通鑑長編紀事本末目錄

廬陵歐陽守道校正

卷第一

太祖皇帝

受禪

親征潞州

親征揚州

收復湖南

收復荆南

卷第二

收復西川

卷第三

收復江南

卷第四

收復嶺南

收復吳越

卷第五 下半卷原闕

親征河東太宗朝附

卷第六 闕

聖德

聖學

親信趙普

卷第七 關

罷節度使權

優禮節度使

駕馭將帥

政迹

卷第八 上半卷 原關

太宗皇帝

受位

秦王事迹

卷第九

諸王事迹

立太子

卷第十

趙普復相

寇準參政

獎用賢臣

貶斥邪佞

卷第十一

錢議

蜀錢

江南錢

農田

何承矩屯田之利

陳堯叟等建水利墾田之議

陳靖墾田之議

塞滑河

卷第十二

陳洪進入朝太祖附

交趾內附

卷第十三

李順之變

李飛雄之變

卷第十四

聖德

聖學

朝儀

正衙

仁宗神宗附

入閣

麻議

太祖附

釋老

聽斷

教閱

政迹

卷第十五

真宗皇帝

親征契丹

卷第十六

王欽若等政定郊邱板位

柴成務等看詳編校

李宗諤等修樂器

王欽若等編冊府元龜

王欽若等校道藏經

田錫御覽

胡旦兩漢春秋

卷第十七

封泰山 天書附

卷第十八

建玉清昭應宮 天書附

卷第十九

謁諸陵

祀汾陰

卷第二十

崇奉聖祖

崇奉五嶽

謁太清宮

諸建宮殿

卷第二十一

聖德

聖學

政迹

不强任大臣

善任藩方長吏

大閱

大酺

卷第二十二

种放出處

楊億進退

王欽若事迹

卷第二十三

丁謂事迹

卷第二十四

朱能偽造天書

周懷政陰謀廢立

雷允恭擅易皇堂

卷第二十五

劉盱之變

王均之變

宜州陳進之變

瀘蠻之叛

卷第二十六

晏夷野望行牌之變

撫水蠻叛

渭水蕃族唃廝囉叛服

卷第二十七

莊獻垂簾楊太后

卷第二十八

訓導太子

卷第二十九

仁宗皇帝

經筵

轉對

上三朝附

入閣

神宗附

耕籍田

校獵

卷第三十

聖德

政迹

定乘輿之制

卷第三十一

議樂

景祐初議

皇祐再定

卷第三十二

修唐書

修國史

看詳編勅

修定厯法真宗附

中書樞密分合神宗附

禮儀院廢置

王清昭應宮災

太內災

卷第三十三

追尊莊懿太后

反莊獻太后之政

莊惠嗣尊號

皇后郭氏入道范仲淹等諫附

美人尚氏楊氏爭寵

皇后曹氏立

卷第三十四

宦寺專恣

外戚驕橫

張貴妃寵幸

卷第三十五

宗室遷官

置睦親宅

荆王元儼

卷第三十六

王欽若復相

曹利用罷樞密使

王陳韓石罷政

大臣外輔

陳堯咨出鎮天雄

晏殊出知宣州

錢惟演改判河南

王駿出知河南

張士遜得謝

林瑀通判饒州

余靖分司南京

龐籍出知鄆州

吳育判延州

宋祁出知鄭州

卷第三十七

呂夷簡事迹

夏竦事迹

卷第三十八

富范奏十事本末

富范等以朋黨見譏

王拱辰等劾蘇舜欽

陳執中排杜衍

蔡襄等言陳執中

歐韓石以論救范富貴罷

韓范爭論殺晁仲約事

吳賈張爭論唐詢事

卷第三十九

唐介劾張堯佐

吳中復等論梁適

趙抃等言陳執中與范鎮爭辨附見

卷第四十

張昇等劾劉沆

唐介等劾張旭

梁堅等劾滕宗諒

龐籍梁適言狄青拜樞密事

歐陽脩呂景初劉敞論狄青可疑事

卷第四十一

減浮費

按察官吏

卷第四十二

明黜陟

抑僥倖李東之等議減任子附見

均公田

卷第四十三

募兵減兵附

卷第四十四

馬政

營田

均賦

建倉

常平倉

義倉

廣惠倉

卷第四十五

茶法

十三場利害

鹽法

議陝西鹽

權河北鹽

易東南鹽

給虔州鹽

錢幣

商州鑄大錢

成都陝西交子務神宗附

卷第四十六

塘水

脩水洛城

卷第四十七

塞河

脩滑州河

脩澶州河

再脩澶州河

卷第四十八

外郡寇賊

西邊屬羌之類

桂陽蠻徭之叛

卷第四十九

廣蠻區希範內寇

清井夷叛

保州兵亂

具卒王則之叛

親從顏秀之變

卷第五十

廣源壘叛

卷第五十一

英宗冊立始末

卷第五十二

李瑋尚康福公主

文彥博叱史志聰

英宗即位

卷第五十三

英宗皇帝

經筵神宗附

編修通鑑

麻法神宗附

卷第五十四

光獻垂廉

卷第五十五

濮議

卷第五十六

教養宗室

疑蔡襄

刺義勇

去冗官

訓導皇子

卷第五十七

神宗皇帝

宰相不押班

宰相辭郊賞

卷第五十八

歐陽修証謗

司馬光彈劾

呂誨劾安石

卷第五十九

王安石事迹上

卷第六十

王安石事迹下

卷第六十一

呂惠卿姦邪

李定姦惡

卷第六十二

蘇軾詩獄

卷第六十三

王安石毀去正臣

卷第六十四

王安石專用小人

卷第六十五

常秩擢用

鄭俠貶黜

蔡確欲陷吳克

何正臣誣呂公著

卷第六十六

三司條例司廢置

議減兵數襍類

卷第六十七

裁定臣僚奏薦

裁定宗室授官

裁定京官

裁抑官寺

卷第六十八

青苗法

司馬光辭樞密

曾公亮陳昇之刑去詔語

范鎮辭銀臺司

疏駁韓琦奏疏

卷第六十九

青苗法

呂公著以興甲事出知潁州

趙抃悔恨乞罷

歐陽修被毀

富弼被劾

卷第七十

役法

卷第七十一

保甲

卷第七十二

市易務免行附

卷第七十三

方田

手實

義倉

農田

淤田

水利

種桑

卷第七十四

修經義

置武學

教陣法

卷第七十五

馬政

軍器監

試刑法置律學等附

論肉刑

增吏祿

卷第七十六

薛向等措置陝西折二錢

薛向等措置陝西鹽鈔

蹇周輔措置江南鹽

周尹等措置蜀鹽

李稷等措置蜀茶

周直孫措置在京酒麴

卷第七十七

州縣廢復

濬汴河導洛附

塞曹村河

卷第七十八

詳定郊廟禮文上

卷第七十九

詳定郊廟禮文下
禮部等議附見

卷第八十

定樂器

定朝會儀注

改官制

卷第八十一

修兩朝國史

奉太皇太后 二王附

聖德

政迹

卷第八十二

審官西院

大理寺獄

孔子廟庭配饗

景陵宮繪像

修太乙宮

卷第八十三

种諤城綏州

築甘谷城

卷第八十四

韓絳經畧西事

卷第八十五

取洮河蘭會上

卷第八十六

取洮河蘭會下

卷第八十七

討交趾

卷第八十八

討梅山

平清井蠻

討茂州蠻

討盧州蠻

卷第八十九

徐禧永樂之敗

討安化蠻

撫遇蕃戶董毡

通使高麗

卷第九十

蔡確刑恕邪謀

卷第九十一

哲宗皇帝

宣仁垂簾皇太妃附

卷第九十二

講讀

卷第九十三

求直言

十科舉士

聖德

政迹

卷第九十四

變新法

卷第九十五

用舊臣上

卷第九十六

用舊臣下

卷第九十七

逐小人上

卷第九十八

逐小人下

卷第九十九

調亭

朋黨劉呂罷相附

卷第一百

紹述蘇轍罷政附

卷第一百單一

逐元祐黨上編類章疏附

卷第一百單二

逐元祐黨下詔勝訴理附

卷第一百單三

臺諫言蘇軾策題詩勝附

臺諫言程頤州洛黨並賈易附

卷第一百單四

張舜民罷司職

韓維解機政

王覲罷諫職

鄧溫伯罷翰苑

卷第一百單五

劉安世居諫職

蘇頌罷相范百祿附

二蘇貶逐

卷第一百單六

常安民罷察院

錢勰罷翰林

常立以誣詆貶責

王珪以誣謗追貶

卷第一百單七

蔡確詩謗

劉文書獄

卷第一百單八

差役

卷第一百單九

保甲

馬政

卷第一百一十

常平

青苗

市易
抵當附

卷第一百十一

回河上

卷第一百十二

回河下

導洛
廣武埽附

卷第一百十三

立后 廢后附

配享

卷第一百十四闕

修實錄

修國史

修玉牒

定新麻瘋朝附

渾天儀象

玉璽

改元

卷第一百十五闕

獲鬼章

卷第一百十六闕

取棄湟鄯州

卷第一百十七闕

徽宗皇帝

受位 皇太后同聽政附

御製

御筆

聖德

政迹

卷第一百十八闕

復孟后 元符后附

卷第一百十九 闕

用元祐舊臣

卷第一百二十

逐博卜黨人

卷第一百二十一

禁元祐黨上 元符附

卷第一百二十二

禁元祐黨下

卷第一百二十三

編元符章疏

卷第一百二十四

追復元祐黨

卷第一百二十五

明堂

官制

卷第一百二十六

八行取士

州縣學武學附

卷第一百二十七

道學

神霄宮

方士

卷第一百二十八

三衛

四輔

元圭

九鼎重和九鼎附

八寶

萬歲山

花石綱

卷第一百二十九

陳瓘貶逐

鄒浩貶逐

卷第一百三十

尊王安石

不用呂惠卿

久任曾布

卷第一百三十一

張商英事迹

蔡京事迹

卷第一百三十二

講議司

卷第一百三十三

議禮局

卷第一百三十四

禮制局

卷第一百三十五

大晟樂

四學

卷第一百三十六

當十錢

卷第一百三十七

水磨茶

解池鹽

卷第一百三十八

方田

馬政

卷第一百三十九

收復湟州

卷第一百四十

收復鄯廊州

收復銀州

收復洮州積石軍

卷第一百四十一

討卜漏

討方賊

卷第一百四十二

金盟上

卷第一百四十三

金盟下

卷第一百四十四

金兵上

卷第一百四十五

欽宗皇帝

金兵下

卷第一百四十六

內禪

卷第一百四十七

李綱守義

卷第一百四十八

誅六賊

卷第一百四十九

二聖北狩

卷第一百五十

高宗南渡

皇宋通鑑長編紀事本末目錄

高宗後四朝目今續刊

皇宋通鑑長編紀事本末卷第一

太祖皇帝

受禪

建隆元年春正月辛丑朔鎮定二州言契丹入寇北漢兵自土門東下與契丹合周帝命太祖領宿衛諸將禦之太祖自殿前都虞候再遷都點檢掌軍政凡六年士卒服其恩威數從世宗征伐薦立大功人望固已歸之於是主少國疑中外始有推戴之議壬寅殿前都點檢鎮寧軍節度使太原慕容延釗將前軍先發時都下驢言將以出軍之日策點檢爲天子士民恐怖爭爲逃匿之計惟內庭晏然不知癸卯大軍出愛景門紀律嚴甚衆心稍安軍校

河中苗訓者號知天文見日下復有一日黑光久相摩盪
指謂太祖親吏宋城楚昭輔曰此天命也是夕次於陳橋
驛將士相與聚謀曰主上幼弱未能親征今我輩出死力
爲國家破賊誰則知之不如先立點檢爲天子然後北征
未晚也都押衙上黨李處耘具以其事白太祖弟匡義匡
義時爲內殿祗候供奉官都知即與處耘同歸德節度掌
書記荊人趙普語未竟諸將突入稱說紛紜普及匡義各
以事理逆順曉譬之曰太尉心亦必不汝赦諸將相顧亦
有稍稍引去者已而復集露刃大言曰軍中偶語則族今
已定議太尉若不從則我輩亦安肯退而受禍普察其勢
不可遏與匡義同聲叱之曰策立大事也固宜審圖爾等

何得使駐狂悖乃各就坐聽命普復謂曰外寇壓境將莫誰何盍先攘却歸始議此諸將不可曰方今政出多門若俟寇退師還則事變未可知也但當亟入京城策立太尉徐引而北破賊不難太尉苟不受策六軍決亦難向前矣普謂匡義曰事既無可奈何政須早與約束因語諸將與王易姓雖云天命實係人心前軍昨已過河節度各據方面京師若亂不惟外寇愈深四方必轉生變若能嚴飭軍士勿令剽劫都城人心不搖則四方自能寧謐諸將亦可長保富貴矣皆許諾乃共部分夜遣衙隊軍使郭延贊馳告殿前都指揮使浚儀石守信殿前都虞候洛陽王審琦守信審琦皆素歸心太祖者也將士環列待旦太祖醉卧

初不省 甲辰黎明四面叫呼而起聲振原野普與匡義
入白太祖諸將已擐甲執兵直扣寢門曰諸將無主願策
太尉爲天子太祖驚起披衣未及酬應則相與扶出廳事
或以黃袍加太祖身且羅拜庭下稱萬歲太祖固拒之衆
不可遂相與扶太祖上馬擁逼南行匡義立於馬前請以
剗剗爲戒太祖度不得免乃攬轡誓諸將曰汝等自貪富
貴立我爲天子能從我命則可不然我不能爲若主也衆
皆下馬曰惟命是聽太祖曰少主及太后我皆北面事之
公卿大臣皆我比肩之人也汝等無得輒加凌暴近世帝
王初入京城皆縱兵大掠擅劫府庫汝等無復然事定當
厚賞汝不然當族誅汝衆皆拜乃整軍自仁和門入秋毫

無所犯先遣客省使大名潘美見執政諭意又遣楚昭輔
慰安家人殿前都點檢公署在左掖門內時方開闢設守
備及昭輔至開闢納之宰相未退聞變范質下殿執王溥
手曰倉卒遣將吾輩之罪也爪入溥手幾出血溥喋不能
對天平節度使同平章事侍衛馬步軍副都指揮使在京巡檢
太原韓通自內庭惶遽奔歸將率眾備禦散員都指揮使
蜀人王彥昇遇通於路躍馬逐之至第第門不及掩遂殺
之并其妻子諸將翼太祖登明德門太祖令軍士解甲還
營太祖亦歸公署釋黃袍俄而將士擁質等俱至太祖鳴
咽流涕曰吾受世宗恩厚爲六軍所迫一旦至此慙負天
地將若之何質等未及對散員指揮都虞候太原羅彥瓌

挺劍而前曰我輩無主今日必得天子太祖叱之不退質等不知所爲溥降階先拜質不得已從之遂稱萬歲太祖詣崇元殿行禪代禮召文武百官就列至晡班定獨未有周帝禪位制書翰林學士承旨新平陶穀出諸袖中進曰制書成矣遂用之宣徽使引太祖就龍墀北面拜受宰相扶太祖升殿易服東序還即位羣臣拜賀奉周帝爲鄭王太后爲周太后遷居西京

蘇轍龍川別志言韓通以親衛戰關下敗死太祖脫甲詣政事堂范質見太祖首陳禪代議與國史及飛龍記司馬光記聞朔記等所載都不同恐別志誤韓通倉卒被親兵未嘗交鋒而太祖實歸府第將士即擁范質等

至質等見太祖必不在政事堂其約束將士不得加無
禮於太后少常固先定於未入城時非緣質請也惟執
王溥手出血及光所記質不肯先拜當得其實今參取
刪修

乙巳詔因所領節度州名定有天下之號曰宋改元大赦
內外馬步軍士等第優給命官分告天地社稷遣中使乘
傳齋詔諭天下諸道節度使又別以詔賜焉 辛亥石守
信等並加官爵勲階酬翼戴之勲也 壬子賜文武近臣
禁軍大校襲衣犀玉帶鞍馬有差三年周鄭王出居房州
開寶二年有辛文悅者上幼從其肄業及即位召見授太
子中允判太府寺周鄭王時在房州上謂文悅長者十二

月命文悅知房州事 六年三月乙卯朔房州言周鄭王
組上素服發哀輟視朝十日命還葬慶陵之側曰順陵謚
曰恭帝

親征潞州

建隆元年初昭義節度使兼中書令太原李筠在鎮逾八
年恃勇專恣招集亡命陰爲跋扈之計周世宗每優容之
及上遣使諭以受禪筠即欲拒命左右爲陳麻數乃僂俛
下拜既延使者升階置酒張樂遽索周祖畫像置廳壁涕
泣不已宿佐惶駭告使者曰今公被酒失其常性幸無怪
也北漢主知筠有異心潛以蠟書誘筠筠雖具奏而反謀
已決筠長子守節涕泣切諫筠不聽上手詔慰撫因除守

節爲皇城使筠遂遣守節入朝且伺朝廷動止上迎謂曰
太子汝何故來守節矍然以頭擊地曰陛下何言此必有
譏人間臣父也上曰吾亦聞汝數諫今賊不汝聽不復顧
藉故遣汝來欲吾殺汝矣盍歸語而父我未爲天子時任
汝自爲之我旣爲天子汝不能小讓哉耶守節馳歸具以
告筠筠反謀逾急癸未執監軍亳州防禦使周光遜閑廐
使李廷玉遣其教練使劉繼冲及判官孫孚送於北漢納
款求援筠遣兵襲澤州殺刺史張福據其城從事閻邱仲
卿說筠曰公以孤軍舉事其勢甚危雖倚河東之援恐亦
不得其力大梁甲兵精銳難與爭鋒不如西下太行直抵
懷孟塞虎牢據洛邑東向而爭天下計之上也筠曰吾周

朝宿將與世宗義同兄弟禁衛皆吾舊人必將倒戈來歸
況吾有僊珪槍撥汗馬何憂天下哉僊珪筠愛將善用槍
撥汗筠所畜駿馬也 丙戌昭義反書至樞密吳廷祚言
於上曰潞州巖險賊若固守未可以歲月破然李筠素驕
易無謀宜速引兵擊之彼必恃勇出關但離巢即成擒矣
上納其言戊子遣侍衛副都指揮使石守信殿前副都點
檢高懷德帥前軍進討上敕守信等切勿縱筠下太行急
引兵扼其隘破之必矣是日大宴廣德殿 丙申命戶部
侍郎壽陽高防兵部侍郎陽曲邊光範並充前轉運使
五月庚子命宣徽南院使高唐胥居潤赴澶州巡檢殿前
都點檢鎮寧節度使慕容延釗彰德軍留後太原王全斌

率兵由東路與石守信高懷德會 北漢主遣使以詔書
金帛善馬賜李筠筠復遣劉繼冲詣晉陽請北漢主舉軍
南下已爲前導北漢主即日大閱傾國自將行至太平驛
筠身率官屬耆老迎謁遣宣徽使萊人盧贊監其軍筠留
長子守節守上黨自率衆三萬南出 癸卯石守信等言
破筠衆於長平斬首三千餘級 甲辰詔削奪李筠官爵
丁巳詔親征以樞密使吳廷祚爲東京留守端明殿學
士知開封府呂餘慶別之皇弟殿前都虞候光義爲大內
都點檢侍衛馬步軍都指揮使韓令坤率兵屯河陽 己
未帝發大梁 壬戌次滎陽召西京留守河內向拱與語
拱勸上急濟河踰太行乘賊未集而擊之稽留旬浹則其

鋒益熾矣樞密直學士趙普亦言賊意國家新造未能出征若倍道兼行掩其不備可一戰而克上納其言 甲子次河陽 丙寅次懷州 丁卯前軍都部署石守信副都部署高懷德破賊軍三萬餘衆於澤州南獲北漢河陽節度使范守圖殺盧贊筠遁入澤州嬰城自守 六月己巳朔上至澤州督諸軍攻城初吐渾府都留後汾州團練使王全德帥所部從李筠戰澤州南既敗走入潞州與筠子守節爲拒守計及上圍澤州全德大懼與親信數十人犯關來奔龍捷指揮使王廷魯亦自潞州相繼出降賊勢轉蹙澤州城逾旬不下上召控鶴左廂都指揮使薊人馬全義賜食御坐問以計策全義請并力急攻且曰緩之恐復

生變上即命諸軍奮擊全義率敢死士先登飛矢貫臂流血被體全義拔鏃進戰士氣益奮上親率衛兵繼之 辛巳克其城李筠赴火死獲北漢宰相衛融命掩尸骸禁剽掠放澤州民今年田租 乙酉進攻潞州 丁亥筠子守節以城降上赦其罪升單州爲團練用守節爲使是日車駕入潞州宴從官於行宮 辛卯德音降死罪囚流以下原之潞州三十里內勿收今年田租 澤州之未破筠愛妾劉氏謂筠曰軍馬尚有幾何筠曰汝何問爲劉氏曰今孤城危迫旦暮且破若得口馬數百足尚可以犯圍走保上黨樓堞堅固且近河東易於求援與其守死不猶逾乎筠然之料見馬千足將出左右或沮之曰今在帳前皆云

與大王同心一旦出城劫大王降敵其可悔乎筠猶豫未決明日城陷筠走赴火劉氏將從之筠以其有娠麾之使去守節無子購得之卒爲筠後

親征揚州

建隆元年淮南節度使兼中書令滄人李重進周太祖之甥也始與上俱事世宗分掌內外兵權而重進以上英武出已右心常憚焉恭帝嗣位重進出鎮揚州領宿衛如故及上受禪命韓令坤代重進爲馬步軍都指揮使重進請入朝上意未欲與重進相見謂翰林學士李昉曰善爲我辭拒之昉草詔云君爲元首臣作股肱雖在遠方還同一體保君臣之分方契永圖修朝覲之儀何須此日重進得

詔愈不安乃招集亡命增辟浚隍陰爲叛背之計李筠舉兵澤潞重進遣其親吏翟守珣間行與筠相結守珣素識上往還京師潛詣樞密承旨李處耘求見上召問曰我欲賜重進鐵券彼信我乎守珣曰重進終無歸順之心矣上厚賜守珣許以爵位使說重進稍緩其謀無令二兇並作分我兵勢守珣歸勸重進養威持重未可輕發重進信之上已平澤潞則將經畧淮南戊申徙重進爲平盧節度使重進心益疑懼 庚戌又遣六宅使陳思誨齎鐵券往賜以慰安之思誨至淮南李重進即欲治裝隨思誨入朝左右沮之重進猶豫不決又自以前朝近親恐不得全乃拘留思誨益治反具遣使求援於唐唐主不敢納揚州都監

右屯衛將軍安友規知重進必反踰城來奔重進疑諸將
皆不附乃囚軍校數十人悉斬之 己未重進反書聞上
命馬步軍副都指揮使歸德軍節度使石守信爲揚州行
營都部署兼知揚州行府事殿前都指揮使義成節度使
王審琦爲副宣徽北院使李處耘爲都監保信節度使朱
延渥爲都排陣使帥禁兵討之 癸亥詔削奪李重進官
爵 十月庚午安友規至上以爲滁州刺史令監護前軍
進討上問樞密副使趙普以揚州事宜普曰李重進守薛
公之下策行武侯之遠圖憑恃長淮繕修孤壘無諸葛誕
之恩信士卒離心有袁本初之彊梁計謀不用外絕採
援內乏資糧急攻亦取緩攻亦取兵法尚速不如速取之上

納其言 丁亥下詔親征以皇弟先義爲大內都部署吳
廷祚權東京留守呂餘慶副之 庚寅上發京師百司六
軍並乘舟車下 癸巳次宋州 十一月戊戌次宿州
甲辰次泗州舍舟登陸命諸將鼓行而前 丁未至大義
驛石守信遣使馳奏揚州即破請上亟臨視是夕次其城
下燈時攻拔之李重進盡室赴火死陳思誨亦爲其黨所
害上購得程守珣補殿直俄遷供奉官兄深州刺史重興
初聞其叛即自殺弟解州刺史重贊子尚食使延福並戮
於市 己酉賑給揚州城中民米人一斛十歲以下給其
半 庚戌詔重進家屬部曲並釋罪逃亡者聽自首 乙
丑今宣徽北院使李處耘權知揚州 十二月己巳上發

揚州 丁亥至京師

收復湖南

建隆三年武安節度使兼中書令周行逢病革召其將吏以其子保權屬之曰吾起隴畝爲兵同時十人皆以誅死惟衡州刺史張文表獨存常怏怏不得行軍司馬吾死文表必叛當以楊師璠討之如不能則嬰城勿戰自歸朝廷可也行逢卒保權領留後務 十月張文表聞周保權立怒曰我與行逢俱起微賤立功名今日安能北面事赤子乎會保權遣兵更戍永州路出衡文表遂驅以叛僞矯素若將奔喪武陵者過潭州時行軍司馬廖簡知留後素輕文表不爲之備方宴飲文表率衆徑入府簡醉與座客十

餘人皆遇害文表取其印綬自稱權留後事具表以聞保
權即命楊師璠赴京集文表又遣使求援於荆南且來乞
師文表亦上疏自理十二月丁亥以武平節度副使知
朗州周保權爲武平節度使甲辰遣內使趙燧等齎詔
宣諭朗州曰即聽張文表歸闕且命荆南發兵助保權
乾德元年正月庚申以山東道節度使兼侍中慕容延釗
爲湖南道行營都部署樞密副使李處耘爲都監遣使十
一人發安復鄧陳澶孟宏亳潁光等州兵會襄陽以討張
文表楊師璠之討張文表也兵稍失利相持既久文表出
戰師璠大敗之遂取潭州執文表初文表聞王師來伐潛
送款於趙璘璘自以奉詔諭文表得其歸順甚喜即遣使

慰撫之師璠兵既入城縱火大掠而燬亦繼至明日享將吏於延昭門指揮使高超語其衆曰觀中使之意必活文表若文表至闕圖害朗州吾輩無遺數矣乃斬文表於市盡腐食其肉及宴冠燬召文表超曰文表復謀爲亂已斬之矣燬太息久之

楊師璠以三年十月出師四年正月張文表乃成擒其間必有相持守處而史及雜記傳皆不載五代史稱師璠至平津亭文表出戰即敗之大定錄亦稱未逾月師璠遂斬文表而九國志則載師璠始爲文表所敗王師將至文表乃送款朗兵因得入城竟不載師璠勝負如何並疑未得其實五代史及大定錄則日月太迫與事不

合而九國志所云朗兵因王師得入城亦必差又恐師
璠初爲文表所敗已而相持守後乃得勝於平津亭因
破潭州而文表蓋嘗遣使詣趙燧乞降潭州既破燧適
至耳非因燧至潭州始破也

二月癸巳王師因假道遂收復荆南並發兵日夜趨朗州
周保權懼召觀察判官李觀象謀之觀象曰凡所以請援
於朝者誅張文表耳今文表已誅而王師不還必將盡取湘湖
之地然我所恃者北有荆渚以爲唇齒今高氏束手聽命朗州
勢不獨全莫若幅巾歸朝幸不失富貴保權將從之指揮
使張從富等不可乃相與爲拒守計慕容延釗使丁德裕
先往安撫德裕至朗州從富等不納盡撤部內橋梁洗船

船伐木塞路德裕不敢與戰退軍須朝旨延釗以聞上遣使諭周保權及將校曰爾本請師救援故發大軍以拯爾難今妖孽既殄是有大造於汝也何爲反距王師自取塗炭重擾生聚保權爲左右所制執迷不復遂進討慕容延釗遣戰棹都監武懷節等分兵趣岳州大破賊軍於三江口獲船七百餘艘斬首四千餘級遂取岳州三月張從富等出軍於澧州南與王師遇未及交鋒賊軍望風而潰李處耘遂北至故山寨賊棄寨走俘獲甚衆處耘擇所俘體肥者數十人令左右分食之少健者悉黥其面令先入朗州會慕容寨中遊明慕容延釗繼至所黥之俘得入城悉言被擒者爲王師所啗食衆大懼縱火焚州城驅畧居

民奔竄山谷 壬戌王師入朗州擒張從富於西山下梟
其首賊將汪端執周保權并家屬亡匿江南岸僧舍李處
耘遣麾下將田守奇往捕之端棄保權走守奇獲保權以
歸於是盡湖南荒地凡得州十四監一縣六十六戶九萬
七千三百八十八 四月甲申德音減潭朗州死罪囚流
以下釋之 丙午以樞密直學士戶部侍郎薛居正權知
朗州 七月王師既平湖湘知溪州彭允林前溪州刺史
田洪藝等列狀求內屬薛居正言賊將汪端領數萬人寇
州城都監尹重審擊走之 甲戌周保權詣闕待罪詔釋
之以爲右千江衛二將軍 乙亥增築朗州城浚其濠賜
營內民今年貢租 九月慕容延釗言獲汪端磔於朗州

市 十月癸未令襄州盡索湖南行營諸軍所掠生口遣
吏分送其家 己丑以前鼎州節度掌書記李觀象爲左
補闕嘉其始謀歸順也 太宗雍熙二年五月左羽林統
軍周保權卒

收復荆南

建隆元年八月荆南節度使守太傅兼中書令南平正懿
王保融寢疾以其子繼元幼弱未堪承嗣命其弟行軍司
馬保勗總判內外軍馬事甲午卒 二年九月甲子以荆
南行軍司馬寧江節度使高保勗爲荆南節度使上聞保
融之喪遣兵部尚書李濟往弔及還上問保勗堪其事否
濟以爲可任而保勗貢奉數至乃授節鉞保勗性淫恣又

好營造軍民咸怨記室孫光憲諫曰宋有天下四方諸侯
屈服面內凡下詔書皆合仁義此湯武之君也公宜克勤
克儉勿奢勿僭上以奉朝廷中以嗣祖宗下以安百姓保
勗不從三年十一月保勗寢疾召牙內都指揮使梁延
嗣謂曰我疾遂不起兄弟孰可付之後事者延嗣曰公不
念正懿王乎先王舍其子繼沖以軍府付公今繼沖長矣
保勗曰子言是也即以繼沖權判內外兵馬事甲戌保勗
卒乾德元年正月以山東道節度使兼侍中慕容延釗
爲湖南行營都部署樞密副使李處耘爲都監發兵討張
大素先是盧懷忠使荆南上謂曰江陵人情去就山川向
背我盡欲知之懷忠使還報曰高繼沖甲兵雖整而控弦

不過三萬年穀雖登而民困於暴斂南通長沙東距建康
西迫巴蜀北奉朝廷觀其形勢日不暇給取之易耳於是
上召宰相范質等謂曰江陵四分五裂之國今假道出師
因而下之蔑不濟矣壬戌李處耘辭上遂以成算授之高
繼沖自以年幼未知民事政刑賦役委節度判官孫光憲
軍旅調度委衙內指揮梁延嗣二月李處耘至襄州處耘
先遣閭門使丁德裕喻繼沖以假道之意請具薪水給軍
繼沖與其僚佐謀以民庶恐懼爲辭願供芻餼百里外處
耘又遣德裕往光憲延嗣請許之兵馬副使李景威說繼
沖曰今王師雖假道以收湖湘然觀其事勢恐因而棄我
景威願效犬馬之力假兵三千於荆門中道險隘設伏攻

其上將王師必自退却回軍收張文表以獻朝廷則公之
功業大矣不然且有搖尾乞食之禍繼沖曰吾家累歲奉
朝廷必無此事爾無過慮況爾又非慕容延釗之敵乎景
威又曰舊傳江陵諸處有九十九洲若滿百則有王者興
自武信王之初江心深浪之中忽生一洲遂滿數昨此洲
漂沒不存茲亦可憂也光憲謂繼沖曰景威安識成敗且
中國自周世宗時已有混一天下之志聖宋受命凡所指
置規模益宏遠今伐文表如以山壓卵耳湖湘既平豈有
復假道而去耶不若早以疆土歸朝廷去斥堠封府庫以
待則荆楚可免禍而公亦不失富貴繼沖以爲然景威知
計不行出而嘆曰大事去矣何用生爲因扼吭而死景威

歸州人也繼沖遣延嗣與其叔父掌書記保寅奉牛酒來犒師且覘師之所爲壬辰師次荆門處耘見延嗣等待之有加諭令翌日先還延嗣喜馳使報繼沖以無虞荆門距江陵百餘里是夕延嗣召延嗣等晏飲其帳處耘將輕騎數千倍道前進繼沖初但欲保寅延嗣之還遽聞大軍奄至即皇恐出迎處耘於江陵北十五里處耘揖繼沖令侍延嗣而率親兵先入登北門比繼沖與延嗣俱還則王師已分據衝要布列街巷矣繼沖大懼即詣延嗣納牌印遣客將王昭濟等奉表以三州十七縣十四萬二千三百戶來歸 庚子荆南表至上復命高繼沖爲節度使遣樞密承旨王仁瞻赴荆南巡檢 辛亥以梁延嗣爲復州防禦

使孫光憲爲黃州刺史王昭濟爲左領軍銜將軍 上聞
李景威之謀曰忠臣也命王仁贍厚卹其家 四月乙酉
命刑部郎中賈玘通判荆南軍州十二月以荆南節度使
高繼沖爲武寧節度使先是繼沖表乞陪祀許之因舉族
歸朝乃命易鎮

皇宋通鑑長編紀事本末卷第一

皇宋通鑑長編紀事本末卷第二

太祖皇帝

收復西川

建隆三年十二月蜀主命官磨勘四鎮十六州逋稅自廣
政十五年至二十年別行追督龍遊令田淳上疏諫蜀主
不能用淳每謂所親曰吾觀僭偽改廳堂爲宮殿改紫綬
爲黃服改前驅爲警蹕改僚佐爲卿相改妻妾爲妃后何
如常稱成都尹乃無滅族之禍乎聞者皆爲之恐淳論議
自若 乾德元年四月庚子以華州團練使張暉爲鳳州
團練使兼西面行營巡檢壕寨使上始謀伐蜀乃徙暉鳳
州暉盡得其山川險易因密疏進取之計上覽之甚悅

五月蜀宰相李昊言於蜀主曰臣觀宋氏啟運不類漢周天厭亂久矣一統海內其在此乎若通聘貢亦保安三蜀之策也蜀主將發使王昭遠固止之乃以文思使景處唐等率兵屯峽路又遣使往涪瀘戎等州閱權手增置水軍六月辛丑以龍捷都指揮使岳州防禦使馬仁瑀等還領漢彭諸州防禦使二年十一月先是蜀山南節度判官張廷偉說通奏使知樞密院事王昭遠曰公素無勲業一旦位至樞近不自建立大功何以塞時論莫若遣使通好北口令其發兵南下我即自黃花子午谷出兵應之使中原表裏受敵則關右之地可撫而有之昭遠然之勸蜀主遣樞密院大程官孫遇興州軍校趙彥韜及楊嗣等以

蠟彈帛書間行遺北漢主言已於襄漢增兵約北漢濟河
同舉遇等至都下彥韜潛取其書以獻有穆昭嗣者初以
方伎事高氏於是爲翰林醫官上數召見問蜀中地理昭
嗣曰荆南卽西川江南廣南都會也今已克此則水陸皆
可趨蜀上大悅後數日上得彥韜所獻書覽之笑曰吾西
討有名矣乃并款遇嗣使指陳山川形勢戍守處所道里
遠近盡以爲圖 甲戌命忠武節度使王全斌爲西川行
營鳳州路都部署武信節度使侍衛步軍都指揮使大名
崔彥進副之樞密副使王仁贍爲都監寧江節度使侍衛
馬軍都指揮使劉光義爲歸州路副都部署內客省使樞
密承旨曹彬爲都監合步騎六萬分路進討給事中沈義

倫爲隨軍轉運使均州刺史曹翰爲西南面轉運使上以西川將校多北人賜諭令轉禍爲福有能鄉導大軍供餽兵食率衆歸順舉城來降者當議優賞命八作司度右掖門南臨汴水爲蜀主治第凡五百餘間供帳什物皆具以待其至乙亥全斌等辭宴於崇德殿上出畫圖授全斌等因謂曰西川可取否全斌等對曰臣等仗天威遵廟算尅日可定也龍捷右廂都指揮使史延德前奏曰西川在天上固不可到在地上到即平矣上嘉其果敢慰勉之謂全斌等曰凡克城寨止籍其器甲芻糧悉以錢帛分給戰士吾所欲得者土地耳蜀主聞有北師以王昭遠爲北面行營都統左右衛聖馬步軍都指揮使趙崇勰爲都監山南

節度使韓保正爲招討使洋州節度使李進爲副招討使
帥兵拒戰蜀主謂昭遠曰今日之師卿所召也勉爲朕立
功昭遠好請兵書頗以方畧自任始發成都蜀主命宰相
李昊等餞之城外昭遠手執鐵如意指揮軍事自比諸葛
亮酒酣攘臂謂昊曰吾此行何止克敵當領此二三萬雕
面惡少兒取中原如反掌爾 十二月辛酉王全斌等攻
拔乾渠渡万仞燕子等寨遂取興州敗蜀兵七千人獲軍
糧四十餘萬石刺史藍思綰退保西縣全斌又攻石碭魚
關白水關二十餘寨皆拔之 蜀招討使韓保正聞興州
破遂棄山南退保西縣馬軍都指揮使史延德以先鋒至
保正懦弱不敢出遣兵數萬人依山背城結陣自固延德

擊走之追擒保正及其副李進獲糧三十餘萬斛崔彥進與馬軍都監康延澤等逐北過三泉遂至嘉州殺虜甚衆蜀軍燒絕棧道退保葭萌劉光義等入峽路連破松木三會巫山等寨殺其將南光海等死者五千餘人生擒戰棹都指揮使袁德宏等千二百人奪戰艦二百餘艘又斬獲水軍六千餘衆初蜀於夔州鑲江爲浮梁上設敵棚三重夾江列礮具光義等行上出地圖指其處謂光義曰游流至此切勿以舟師爭勝當先遣步騎潛擊俟其稍却乃以戰棹夾攻可必敗也光義等未至鑲江三十里許捨舟前奪浮梁復引舟而上遂頓兵白帝廟西蜀寧江節度使高彥儔謂副使趙崇濟監軍武守謙曰北軍涉險遠來利

在連戰宜堅壁待之守諫曰寇據吾城下而不擊又何待也戊辰守諫獨領麾下十餘人以出光義遣馬軍都指揮使張廷翰等引兵與守諫戰於猪頭舖守諫敗走廷翰等乘勢登其城彥儔整衆將出關而廷翰等已入其城中矣彥儔力戰不勝身被十餘鎗左右皆散去彥儔奔歸府第判官羅濟勸彥儔單騎歸蜀彥儔曰我昔已失秦州今復不能守此縱人主不殺我我何面目見蜀人乎濟又勸其降彥儔曰老幼百口俱在成都以一身偷生舉族何負今日止有死耳即解符印授濟曰君自爲計乃反拒其戶整衣冠望西北再拜登樓縱火自焚王全斌以蜀人斷棧大軍不得進議取羅川路入蜀康延澤潛謂崔彥進曰羅

川路險衆難並濟不如分兵修棧約會大軍於深渡可也
彥進遣白金瑱許之不數日閣道成遂進擊金山寨又破
小漫天寨而全斌亦以大軍由羅川至深渡與彥進會蜀
人依江而陣彥進遣步軍都指揮使張萬友等擊之奪其
橋會暮夜蜀人退保大漫天寨明日彥進延澤萬友分兵
三道擊之蜀人悉其精銳來拒又大破之乘勝拔其寨擒
寨主義州刺史王審超監軍趙崇滋及三泉監軍劉延祚
都統王昭遠都監趙崇勳引兵來戰三戰三敗追奔至利
州北昭遠等遁去渡桔柣津焚浮梁退保劍門壬申晦全
斌等入利州獲軍糧八十萬斛是月京師大雪上設毬帷
於講武殿衣紫貂裘帽以視事忽謂左右曰我被服如此

體尚覺寒念西征將帥衝犯霜霰何以堪處即解裘幅遣
中黃門馳驛齎賜金襴且諭旨諸將以不能徧及金襴拜
賜感泣先鋒都指揮使鳳翔團練使張暉督兵開大散關
路至清泥嶺病卒詔優卹其家 三年正月蜀主聞王昭
遠等敗甚懼乃多出金帛益募兵守劔門命太子元詰爲
元帥武信節度使兼侍中李廷珪及前武定軍節度使同
平章事張惠安副之帶甲萬餘旗幟悉用文繡綢其杠以
錦將發而雨元詰慮其沾濕悉令解去俄而止復旆之則
皆倒懸杠上元詰又輦其姬妾及伶人數十以從見者莫
不竊笑王金斌等自利州趨劔門次益光會議曰劔門天
險古稱一夫荷戈萬夫莫當諸君宜求進取之策侍衛軍

頭向船曰得降卒進言益光江東越大山數重有狹徑
名來蘇蜀人於江西置柵對江可渡自此出劔門南二十
里至青彊店與官道合若大軍行此路則劔門之險不足
恃也全斌等即欲卷甲赴之康延澤曰蜀人數戰數敗膽
氣奪矣可急攻而下且來蘇狹徑主帥不可自行但可遣
一偏將往耳若拔青彊北與大軍夾擊劔門昭遠等必成
擒矣全斌等然之命史延德分兵趨來蘇跨江爲浮梁以
濟蜀人見之棄寨而走延德遂至青彊王昭遠等引兵退
駐漢源坡留其偏將守劔門全斌等以銳兵奮擊破之及
漢源趙崇韜布陣策馬先登昭遠據胡牀不能起崇韜戰
敗猶手斬數人乃被執昭遠免胄棄甲而逃全斌等遂取

劍州昭遠投東川匿民倉舍下悲嗟流涕目盡腫惟誦羅
隱詩曰運去英雄不自由俄亦爲追騎所獲太子元結與
李廷珪等日夜嬉遊不恤軍政至縣州聞劍門已破將退
保東川翌日棄軍西還所過盡焚其廬舍倉廩乃去蜀主
知劍門已破太子元結亦奔還惶駭不知所爲問左右計
將安出有老將石奉顯者對曰東兵遠來勢不能久請聚
兵堅守以弊之蜀主嘆曰吾父子以豈衣美食養士四十
年一旦遇敵不能爲吾東向放一箭今雖欲閉壁誰肯效
死者司空兼武信節度使平章事李昊勸蜀主封府庫以
請降蜀主從之因命昊草表 己卯遣通奏使宣徽北院
使太原伊審徵奉降表詣軍前蜀之亡也降表亦昊所爲

蜀人夜書其門曰世修降表李家當時傳以爲笑 庚辰
詔行營所經州府長吏以牛酒犒師 乙酉王全斌等次
魏城伊審微以蜀主降表至全斌受之遣先鋒都監通事
舍人田欽祚乘驛入奏又遣康延澤領百騎趨成都見蜀
主諭以恩信慰撫軍民留三日乃還初劉光義等發夔州
萬施開忠等州刺史皆迎降及遂州知州事少府少監陳
愈亦降光義入城盡以府庫錢帛給軍士諸將所過咸歆
屠戮以逞獨曹彬禁之乃止故峽路兵始終秋毫不犯上
間之喜曰吾任得其人矣賜彬詔褒之 辛卯王全斌等
至升仙橋蜀主備亡國之禮見於軍門全斌承制釋之蜀
主復遣其弟保寧節度使雅王仁贄奉表求哀

九國志孟昶世家及蜀檇杌皆言全斌承制釋昶罪昶翌日遂舉族歸朝據國史昶傳昶既見全斌復遣仁哲奉表得太祖還詔乃出蜀又據全斌等入成都後十餘日劉光義始自峽路至昶饋遺光義及攜其師並如全斌等若全斌十九日入成都昶二十日遂行安能饋光義且攜其師也然所稱後十餘日亦恐差悞按新錄光義遂州之奏以二十一日到京師度其克遂州時必在中旬初遂州距成都不過無緣滯留兩旬後始到也當是全斌等於魏城得昶降表後十餘日耳得降表後十餘日乃二三四間此時昶固未出蜀猶可以饋遺光義且攜其師也

丙申田欽祚至自西川孟昶降表以其先人墳廟及老母
爲請上優詔荅之并諭西川將吏百姓等使皆按堵如故
自全斌等發京師至昶降才六十六日凡得州四十六縣
二百四十戶五十三萬四百二十九全斌等既入成都後
數日劉光義等至孟昶饋遺光義等及犒師之禮並如初
已而詔書頒賞諸軍亦無差降兩路將士爭功始相疾矣
先是全斌受詔每制置必與諸將會議因是各爲異同雖
小事亦不能即決全斌及崔彥進王仁贍等日夜飲宴不
恤軍務縱部下掠子女奪財貨蜀人苦之曹彬屢請旋師
全斌等不聽二月癸卯命參知政事呂餘慶權知成都
府樞密直學士馮瓚權知梓州餘慶至成都時盜四起將

士猶恃功驕恣王全斌等不能禁止一日藥市始集街吏
馳報有軍校被酒持刃奪賈人物餘慶立命擒捕斬之以
徇軍中畏服民乃寧居璿至梓州視事才數日會偽蜀軍
校上官進嘯聚亡命三千餘衆劫村民數萬夜攻州城璿
曰賊乘夜奄至此烏合之衆以筭挺相擊必無固志正可
持重以鎮之待旦自潰矣城中止有雲騎兵三百分使守
諸門璿坐城樓密令促其更籌未夜分擊五鼓賊驚遁去
因縱兵追之擒上官進斬於市州境遂安以興州爲步
軍都指揮使趙彥韜爲興州刺史酬其鄉導之功也丙
午詔以西師所過民有調發供億之勞賜秦鳳隴成階褒
荊南房均等州今年夏租之半安復郢鄧州光化漢陽軍

十之二居坊郭者勿輸半年屋稅又詔僞蜀文武官並遣
赴闕賜裝錢有差治行清白爲衆所知者所在州府以名
聞 庚申孟仁贄至自成都孟昶所上表有自量過咎尚
切憂疑等語詔答之其略曰旣自求於多福當盡滌於前
非朕不食言爾無過慮所答詔仍不名又呼昶母爲國母
詔自嘉眉忠萬至荆南沅江分置驛船以濟行李令文武
官任川峽職事者不得以族行 三月孟昶與其官屬皆
挈族歸朝由峽江而下 初詔發蜀兵赴闕並優給裝錢
王全斌等擅減其數仍縱部曲侵撓之蜀兵憤怒思亂兩
路隨軍使臣亡慮百數全斌及王仁贍崔彥進等兵至綿
州果叔屬縣以叛會文州刺史全師雄劫其族赴京師過

綿州師雄嘗爲蜀將有威惠恐叛兵脅之乃棄其家自匿
後數日叛兵搜得之江西民會遂推以爲帥衆十餘萬號
興國軍全斌遣馬軍都監朱光緒將七百騎往招撫之光
緒盡滅師雄之族納其愛妾及素裝帥雄怒不復有歸志
引衆急攻綿州刺史成彥饒以同輩兵百餘人守其城橫
海指揮使劉福龍捷指揮使田紹斌各以所部兵來援紹
斌自東山西北迎擊賊福由山南出賊之旁夾攻之賊衆
大潰斬首萬餘級擁入江水溺死者亦萬計紹斌又敗龍
州賊黨千餘人師雄去攻彭州刺史王繼儔都監李德榮
拒之德榮戰死繼儔身被八槍乘騎走成都師雄入據彭
州成都十縣皆起兵應師雄師雄自號興蜀大王開幕府

置僚屬既而又置節度二十餘人今分據灌口導江郫新
繁青城等縣彥進與步軍都指揮使張萬友先鋒都指揮
使漁陽高彥暉通事舍人田欽祚同討之彥暉至導江與
賊遇賊據隘路設伏竹箐中官軍直進箐中賊出官軍不
利彥暉謂欽祚曰賊勢頗盛日將暮首尾不相應盍取兵
詰朝與戰欽祚將適慮賊踵其後紹謂彥暉曰公食重祿
見賊逗撓何也彥暉卽麾兵復進欽祚乃潛去彥暉獨與
部下十餘騎力戰皆死之賊衆益熾師雄分兵綿漢州斷
劍閣緣江置寨聲言欲攻成都自是邛蜀眉陵簡雅嘉東
川果遂渝合資昌普戎榮十七州並隨師雄爲亂邛傳不
通者月餘全斌等懼時蜀兵計幾三萬人屯城南教塲全

斌慮其應賊徙至夾城中將盡殺之康延澤請釋老幼疾
病者七千人餘則以兵護送浮江而下若賊果來劫奪即
殺之未晚也全斌等不從四月誘殺蜀兵二萬七千人於
夾城中先是上遣使以御府供帳還孟昶於江陵且命有
司爲昶官屬治第又遣使至江陵分給鞍馬車乘 乙酉
昶至近郊皇弟開封尹光義勞之玉津園 丙戌大陳諸
軍於闕前昶與弟仁贇子元喆元珪元珣宰相李昊等三十
三人素服待罪明德門外詔釋罪賜昶等襲衣冠帶上御崇
元殿備禮見之禮畢御明德門觀諸軍按部還營遂宴昶
等於大明殿賜物有差 壬辰復宴昶及其子弟於大明
殿 六月甲辰以孟昶爲開府儀同三司檢校太師兼中

書令泰國公長子元結為泰寧節度使伊審徵為靖難節度使 戊申以昶弟仁贄為右神武統軍仁裕右監門衛上將軍仁操左監門衛上將軍次子元珪為左千牛衛上將軍李昊為工部尚書歐陽炯為右散騎常侍 庚戌孟昶卒上為輟五日朝贈尚書令追封楚王謚恭孝賻布帛千疋葬事官給初昶母李氏隨昶至京師上數命肩輿入宮謂之曰國母善自愛無戚戚懷鄉土異日當送母歸李氏曰使妾安往上曰歸蜀耳李曰妾家本太原僕或歸老并門妾之願也時上已有北征意聞其言喜曰族平劉鈞即如母所願因厚加賚賜及昶卒李氏不哭舉酒酹地曰汝不能死社稷貪生至今吾所以忍死者為汝在耳今汝

既死吾安用生因不食數日亦卒初全師雄至新繁劉先
義曹彬領軍破之生擒萬餘人師雄退屯於郫王全斌王
仁瞻又率兵破之師雄走灌口寨有陵州指揮使袁廷裕
者師雄僞署本州刺史衆萬餘仁瞻復生擒廷裕磔於成
都市賊鋒稍衄徒黨散保州縣未幾虎捷指揮使呂翰怨
其帥不禮率部下兵叛於嘉州橫街指揮使吳瓌虎捷水
軍校孫進等皆應之殺知客省使武懷節戰棹都監劉漢
卿遂與全師雄僞署將劉澤合勢衆至五萬逐普州刺史
劉楚信殺通判劉沂果州軍校宋德威虎捷指揮使馮紹
文并殺知州八作使王永圖通判劉渙都監鄭元弼及遂
州牙校王可僚又劫州民爲亂時賊所在蠱起此但其姓

名可紀者耳均州刺史西南面水陸轉運使曹翰率兵會王仁瞻等圍呂翰於嘉州呂翰棄城走遂入保之是夕賊還結衆圍城約以三鼓進攻翰諜知之戒掌漏者止擊二鼓賊衆不集至明而遁追襲大破之殺戮數萬人呂翰領餘衆走保雅州八月己酉詔以西川兵馬都監康延澤爲普州刺史延澤謂王全斌請兵護送之任全斌才給以百人延澤至簡州招集亡叛凡得千餘人教習戰陣擁以去及賊境申雕領衆五千來迎延澤擊破之生擒七百人斬其受賊署者百餘輩餘皆釋遣揭示威信所招集又得三千人遂破劉澤三萬餘衆賊勢消沮十二月丁卯朔延澤入普州先是州城悉被焚蕩乃依山設柵自固且行

且戰取糧於遂州復城普州既而劉澤領衆來降詔以延
澤兼東川七州招安巡檢使 乾德四年六月王全斌破
賊帥全師雄於灌口寨擒其黨二千人師雄以衆起金堂
閏八月甲子以灌口鎮為永康軍王全斌言破賊帥呂
翰克雅州 十二月丁德裕與西川兵馬都監張延通同
帥師擒賊都統康祚礫於市康延澤既城普州王可僚復
合數州兵來攻延澤擊走追奔至合州全師雄病死金堂
其黨推謝行本為主羅七君為佐國令公羅七君與宋德
威唐陶鼈等並據銅山之險為寨延澤旋破謝行本拔銅
山擒羅七君德裕及全斌等分往招緝賊衆悉平 五年
正月詔賜西川諸州民今年夏租之半初呂餘慶至成都

王全斌但與軍旅嘗謂所親曰我聞古將帥多不能保全功名即欲稱疾東歸庶免悔吝或曰今寇盜充斥非有詔旨不可輕去全斌乃止既而僞蜀臣民往往詣闕訟全斌及王仁贍崔彥進等破蜀時豪奪子女玉帛及擅發府庫隱沒貨財諸不法事使者每自蜀至上問之盡得其狀於是與諸將同時召還仁贍先見上上詰之仁贍歷詆諸將過失冀自解免上曰納李廷珪妓女開豐德庫取金貝此豈諸將所爲耶仁贍惶恐不能對上以全斌等新有功不欲付之獄吏令中書門下遣仁贍彥進全斌與訟者質証全斌等皆具伏癸丑百官集議表言全斌等法當死上特赦之甲寅置崇義軍於隨州以忠武節度使王全斌爲

崇義留後昭化軍於全州武信節度使崔彥進爲昭化留
後樞密副使左衛大將軍王仁瞻罷爲右衛大將軍初王
仁瞻歷詆諸將獨曰清廉畏謹不負陛下任使者惟曹彬
一人耳上固已知彬善於其職於是賞彬獨優以爲宣徽
南院使領義成節度侍衛馬軍都指揮使彬入辭曰諸將
俱獲罪臣獨受賞何以自安不敢奉詔上曰卿有功無過
又不自矜伐苟負纖芥之累仁瞻豈爲卿隱耶德勸國之
常典不可辭也

皇宋通鑑長編紀事本末卷第二